



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Carlos Alcaraz-i US Open
tebur kija asaya kokogo

Israel-i Hamas nem tatembangba
tekum dangtsü agütsür



VOL. XXII ISSUE NO. 326 (ADOK 326)

DIMAPUR

SANGTENNÜ (TUESDAY)

RONGJUI (SEPTEMBER) 09, 20: ₹ 5.00

Naga lanurtemi yimjung aser terenlok aginür: Dr. S C Jamir



Dr. S. C. Jamir

Kohima, September 8, 2025 (TYO): Tanü Naga lanurtem dak pei sasa ketdangsüa liyonga aotsü mesüra Naga state balaka akümtsü tebilemba mali. Parnoki yimjung, terenlok, shisaliok aser India renloka aoba nung sendaktepa onür ta taoba Governor aser Chief Minister Dr. S. C. Jamir-i ashi.

Headquarters Inspector General of Assam Rifles (North)-i Kohima Garrison nung Military-Civil Fusion Seminar ayonga agidang taoba Goa, Maharashtra, Gujarat, aser Odisha Governor aser Nagaland ex-Chief Minister Dr. S.C. Jamir-i iba olen ashi.

Iba sentong nung pa mendentet saka Assam Rifles ketdangsüri pai züluba onük zünga metetdaksü.

Lanuputu taginüba ajitettsüla aser parnok taginübatem asoshi inyakttsüla. Parnoki tesüiba tangatetba agienür aser azükarua liyonga aotsü atema temulung agütsünür ta pai ashi.

Nagaland tarutsü ya yimtenren jenjang tajung, tetezü aketba sorkar ketdangsübaren aser civil o military rejutem tsüngda tesentaktep tajung dak keta lir. Tanü Nagaland nung yimtenren jenjang kanga majung lir aser tangatetba mali ser maongkatem dang bushitepa. Pei nija taginüba nung ajemdaker dang inyaksangshir ta Dr. Jamir-i ashi.

Party melentepba, vote alizükba aser yimtenren maongkatem bushitepa ajanga state nung democratic tangatetba mali kumogo. Tanü politics ya tashi angutsü aser rongsen bendentsü atema dang

lir ta pai ashi.

Telungpur teloktemi Naga nüjiso atema yimjak nung jembir saka parnoki Indian constitutional framework kübok state aser national elections nung shilem agir. Telungpur teloktemi anemsü inyaker aser iba ajanga nübortemi parnok dak aser yimtenren lennirtem dak tamang maka kumogo, ta Dr. S.C. Jamir-isa metetdaksü.

August 3, 2015 nü Framework Agreement aser November 17, 2017 nü Agreed Position ya tongtipang alizüngtem atongba liasü aser item ajanga yimjung aser yimtenren bangzüng agütsü maongka agütsü. Ajisüaka tatembang kati marutetba atema temulung raksar aser iba ajanga Nagaland-i yimtenren ken o mekokteter, ta paisa ashi.

Nagaland nung politics dak tamang makai akümba atema sendaktepa alir ajaki kanga aroka shisadangsüla ta paisa ayongzük. "Naga nunger sobaliba tangatetba nung ajemdaker electoral reforms ali nungang lennir tajungtem adoktsü. Pei akatsü atema masü saka public tenzüksü atema inyakertem adoktsü" ta paisa ashi.

Telungpur teloktemi tsübudaktsüba ajanga Naga nunger tetsüba tia ka nung alir aser ototia pei bilemba mejembitetir ta Dr. Jamir-isa ashi.

Nagaland nung law, order aser sorkar ketdangsübaren tajung akümtsü atema military-civil tesentaktep tajung nungdaker. Assam Rifles aser civil administration tsüngda amalitepa inyaksangshiba ajanga Nagaland tensa tajungba akümtsü aser nübortemi terenlok aser sadoka alitsü nung rangloksü ta paisa metetdaksü.

"Nagaland nung alirtemi asen tarutsü ya India tarutsü den sendaktepa lir ta agizüksüla. India sorkaria education, employment, aser development nung kasa maongkatem agütsütsüla" ta Dr. S.C. Jamir-isa ashi.

India ya global economic superpower ka akümer aser iba maparen nung Nagaland-ia shilem agütsü nungdaker aser ibaji mpaitoktetsü ta paisa shisem.

RMSA-2016 tesayurtemi 'equal pay for equal work' meshia lungkak aiter



Nagaland RMSA Teachers' Association (NRMSATA)-2016 kübok tesayur 367-i Hombar nungi Directorate of School Education, Kohima kima nung mapang telatet makai lungkak aitba noksa nung angur.

Kohima, September 8, 2025 (TYO): Nagaland RMSA Teachers' Association (NRMSATA)-2016 kübok tesayur 367-i Hombar nungi Directorate of School Education, Kohima kima nung mapang telatet makai lungkak aittsü tenzükgoko.

Supreme Court of India-i tesayurtem nem service benefits aser tagütsütsü ajak agüjang ta tetuyuban agüjaka Nagaland sorkari meinyakba atema iba sentong agir ta NRMSATA-2016 batch spokesperson Renbemo L. Patton-i osangbener dang ashi.

Tesayurtem rongnung parnok karbo kinü tanur aniba tetsütem dena lir aser parnoki banners o placards amer lungkak ait.

Lungkak aitertemi "Pay scale is right not request", "Respect the ruling of the court, respect teachers", "Fair treatment not discrimination", "Teachers deserve dignity and respect", "Honor the verdict, value our service", "Court says YES, why does government say NO," "Equal work, equal pay" amala zülür shilem agi.

"Onoki aiben timi onok tebilemstütem lemsatepogo saka magizüker. Iba jagi lungkak aittsüsa akümer" ta Renbemo L.

Patton-i ashi.

Nagaland RMSA Teachers' Association (NRMSATA)-2016 tesayurtemi August 25 nungi pen-down strike agia mezüngbuba lungkak aitba shilem agia liasü.

State sorkari onoki akhangba magütsüba ya ozüng memelaba dang masü saka mezüngmeshiba lir ta RMSA-2016 tesayurtemi ashi.

Sorkari onoki akhangba magizük tashi onoki mener lungkak aittsü. Kohima Deputy Commissioner-i tetuyuba agütsüba sülen anidaka onoki timi dang lungkak aittsü ta parnokisa ashi.

Supreme Court-i lemtetba ama 2016 nung parnok shimokba anogo nungi salary aser service benefits agütsütsü akhanger.

Parnokisa regular annual increments densema ROP 2017 pay scale meshir. SSA-RMSA 2010-13 category nung tesayurtem den kasa meshir.

Tesayurtemisa Office Memorandum No. AR-3/GEN-231/2011 March 29, 2017 nung shia aliba ajunga mapa kuma inyakttsü akhanger.

NRMSATA - 2016 - isa kaketshir teloktem, civil society organizations, workers' associations aser public dang parnok pusema nungittsü

ayongzükur.

"Onoki temeten atema noktaker. Sorkari okadak lemtet meinyakba ajanga onoki lungkak aita ola adoktsüsa akümer" ta spokesperson Renbemo-isa ashi.

August 14 nü department-i lungkak aitba thinena atatsü ashiba atema asüngdangdang "department-i iba onük atsülangtsü meranger, Supreme Court nung parnoki agütsüba appeal ano magizük lir" ta pai langzü.

NRMSATA-2016 tesayurtem ya government schools 133 nung inyaker aser idakji azüngba tanurtem tia atema asüngdangdang "tebilemstü abenba tesayur ama onoki tanurtem atema süoki ia bilemer. Onoki yangi mener lungkak aittsü mebilem. Onoki school-i meyipa orr tanurtem den linür saka onok nem temeten magütsüba ajanga lenmang kecha mali" ta spokesperson Renbemo-isa langzü.

Onoki department den anaben tashi senden menogo saka tajung telemtetba kecha mali. Tang yabo onok teka tazüng meyipa maotsü aser sorkari takhangbatem melangzüra lumia lungkak aittsü ta RMSA-2016 ketdangpurtemi ashi.

Frontier Nagaland Territory atema tanü senden amentsü

Dimapur, September 8, 2025 (TYO): Eastern Nagaland Peoples' Organisation (ENPO), India sorkar aser Nagaland sorkar tsüngda September 9, 2025 nü Chümoukedima nung senden pezübuba amentsü.

Iba senden nung Frontier Nagaland Territory (FNT) atema jembitsü. Taküm July 23 nü Union Ministry of Home Affairs (MHA)-i New Delhi nung senden ka amenba sülen asüng

amentsü.

MHA-i ayonga senden amenba sülen ENPO-i mangatettep aliba onüktem angatettepa arudar saka Nagaland sorkari onük kar metembang lir ta shia liasü.

Centre sorkar ketdangsürtemi olemtep nung süoki ia aser inyakttsü onüktem benoka lemsateper. Union home secretary-i state sorkar ketdangsürtem dang hopta ana

tsüngda lemtettem agütsü shiogo ta ENPO-i metetdaksü.

July nung amenba sülen August nung senden amentsü imlaa liasü saka September 9, 2025 nung ang amentsü ayongzükogo.

India sorkari political solution ka ama FNT agütsütsü ashi saka ENPO lennirtemi iba maparen ya Eastern Nagaland nungertemi agizüktetsüa asütsüla ta telangzüba agüja liasü.

TENÜNGSANG AGÜTSÜR

Shri, **Alemyanger Aier** S/o Supongsashi Aier of Sungratsü Village, P/T, T/Incharge of GPS Changtongya Yimsen-i 64th Teachers Day anogo nung District Teachers Award 2025 ngutet nung pa nem tenüngsang tulu agütsür. School nem konang nungsang tulu bener arutsü nung pelaba metetdaksür.

Tsüngrem taochi kübok ne maparen ajak nung takok ngua aotsü sarasademtsür.

~ Teachers, Students & SMC

TR. Zeliang-i Peren nûburtem dang technical shisatsü angazüktsü ayongzük



Deputy Commissioner, Peren indang Conference Hall nung September 8, 2025 nü Peren District Planning & Development Board senden amendang tangokba noksa ka yangi angur.

Dimapur, Rongjui/Sept. 08 (TYO): Peren District Planning & Development Board (DPDB) ita shia amenba senden September 8, 2025 nü Deputy Chief Minister, Planning & Transformation, National Highway, T.R. Zeliang lenisüba kübok DC's Office, New District headquarter, Peren nung mena liasü.

Taoba senden nung lemtetba lepa reprangshia senden tenzük aser iba sülen department balala indang agenda tem benoka liasü.

Iba mapang Board-i Tening Namsan nung Government Primary School lapoktsü proposal agütsüba agizüka liasü aser November ita 11th Inter-Departmental tournament ayongzüktsü aser iba atema Convener ama Additional Deputy Commissioner, Peren, züngsem ama SDO Civil Headquarter aser Member Secretary ama District Sports Officer nung lenisüba kübok Organising Committee ka shima liasü.

Principal Polytechnic ajanga report agütsüba nung langzua jembidang, lanur nem tanem-

tanemi technical education agütsütsü asoshi state sorkari tejakleni otar, ta Deputy Chief Minister, T.R. Zeliang-i ashi.

Iba dak sendakba nung Zeliang-i Tening aser Nsong circle densema Peren district kübok Civil Society Organisation asoshi Sensitization Programme ayongzüktsü Deputy Commissioner, Peren nem nungloktsü.

Sorkari Polytechnic, Peren densema state nung aliba educational institution ajunga nung Lecture tetemsü shimer yuja lir, anungi civil society temi item maongka agütsüla, ta Zeliang-i ayongzük.

Pai ITI & Polytechnic, Peren dang district nung sensitization seminar ayongzükba mapang PowerPoint presentation renema agütsütsü nungloktsü aser DC, Peren-ia district nung nûburtem nem technical education angazükdahtsütsü asoshi seminar ka ayongzüktsü ta ashi.

DC-isa internet service agütsür aser tim department dang district headquarter nung aliba Government office tiptema

inyaktsü asoshi internet facilities aser office nung aser temeket nung lenmang tajungba kuma yanglutsütsü shiogo ta senden nung metetdahtsü.

District headquarter nung ali lezmüksüba indang jembidang, head of offices aika nem pei indang department office yanglutsü asoshi ali lema agütsüogo, ta DC-i ashi.

Iba dak sendakba Deputy Chief Minister-i district officers tem dang parnok office yanglutsü asoshi departmental contractor tem den osang agiteptsü ayongzükba liasü.

Peren New District Headquarter ya Nagaland indang mezüngbuba master plan lir, koba Model Township aser talisa offices aser quarters yanglutsü atema lazüka lir, ta Zeliang-i ashi aser district nung iba policy shidak inyaktsü ta metetdahtsü.

Iba senden nung Survey Officer, Department of Land Record, Phenrongwi Zeliang ajanga district nung department inyakyim indang PowerPoint agütsü aser menden nungi melepzüng o jembia senden tembang.

Longleng nung tepuokdak alir den fellowship agi

Dimapur, Rongjui/Sept. 08 (TYO): Yingli Keikung, PLV Longleng District Legal Services Authority (LDLSA) teyari nung Phomla Hoichem den lungjemer District Jail, Longleng nung September 7, 2025 nü Drugs Awareness and Wellness Navigation (DAWN) Scheme 2025 kübok fellowship programme-cum-awareness sentong ayongzükba liasü.

Tepuokdak alirtem tanüla nung aintsü, akhi ama kumdaktsütsü aser nûburtem den amalitep akatsü nükjidong nung iba sentong ya ayongzük, ta sentong nung menden, Retainer Lawyer (LDLSA) Panglang Y. Phom-i ashi aser DAWN Scheme indanga tepuokdak alirtem den lemsatepa liasü.

Temeseppa mozü aser chiyongtsütem ajanga temang nung timtem agütsüba indang Phomla Hoichem tir Ainyu Phom-i lemsateppa mapang, temeseppa mozü 'supply and demand chain' azüoktsü tasa indang asgi.

Secretary (LDLSA), Kumdilong Kessen, (NJS) ajanga Phomla Hoichem dang iba sentong ayongzükba asoshi tenütsang agütsü aser tepuokdak alir aser takum melenshir aliri temi takum kuli lemsatepa tayongzükba o jembia liasü.

Aphang Phom-i anir Phomla Hoichem executive züngsem tem aser tepuokdak alirtemi temeja ken aden aser banana chips ayokba nungi aruba sen aser tenla bendenba ajunga tepuokdak alirtem welfare fund atema agüja liasü.

Iba fellowship sentong tembangba sülen Phomla Hoichem tiri anir tepuokdak alirtem dang banana aser potato chips yangluba sayua liasü.

Iba sentong nung LDLSA ajanga somomo aser packaging materials agütsü, District Jail Longleng ajanga totzü agütsü aser Phomla Hoichem-i wok, vegetable slicer aser kidang nüngdakba osettem agüja liasü.

Iba sentong nung tepuokdak alir nisung 17 shilem agia liasü.



Deputy Commissioner, Mokokchung, Ajit Kumar Verma, IAS lenisüba kübok sendaktepa aliba department tem, CSOs, District Master Trainers-i anir Area Administrative Officers tem den "Aadi Karmayogi Abhiyaan" Campaign, indang District Level Orientation sentong ka DC's Conference Hall, Mokokchung nung September 8, 2025 nü agidang tangokba noksa ka yangi angur.

Fazl Ali College pur 66 buba Foundation Day mungogo



Dimapur, Rongjui/Sept. 08 (TYO): Fazl Ali College, Mokokchung lapoker küm 66 ajungba (66th Foundation Day) anogomung September 8, 2025 anepdang 10:00 ako nungi tenzükba college auditorium nung munga liasü.

Menden Lushian H, Assistant Professor, Department of Economics ajanga pela agizükba o jembia sentong tenzük aser choir ajanga college anthem tena liasü.

Iba sülen English Department Drama Club ajanga William Shakespear indang Twelfth Night nung ajemdaker jilushi ka agi shilem agi aser college Principal-i iba anogomung nüngtem nung jembidang tesüiba session nung college indang takok aser terenlok aliba indang lemsatepa liasü.

Academic tsütsü college nungi university toppers 24 adokogo, B.Com course tenzükogo, science stream nung kaketshir timba kumogo, tesayur temi lenla balala nung takok angu, ta pai ashi aser tang teinyakdak research projects aser ano seminar aser mungdang ayongzükba indanga lemsatep.

Ki o jen terenlok mapa inyakba, institution balala den MoUs zülutepba indanga pai ashi aser taruba sessions asoshi teinyaktsütem lemsatepa liasü.

Iba sülen Dr. Adangla Changkija, Convenor, Awards Committee ajanga department shia toppers, overall college topper, stream toppers, Student of the Year aser wadang balala nung takok anguba kaketshir nem sempet agüja liasü.

Sentong akhumdong Deputy Commissioner, Mokokchung,

Ajit Kumar Verma, IAS ajanga tayongzükba o jembia aser college tenzükba dak mangdang tajung akaba tenütsang agütsü aser kaketshir aser tesayurtem dang iba mapa tajung maneni inyaktsü ayongzükba liasü.

Education ya graduation aser certificates nung kisüng metembanger, ibai lokti nung shilem tajung agiba indang lir, ta pai ashi.

Paisa college ya maparen tasen tenzükba tiyong südaktsütsü ajungshi aser Mokokchung ya 'land of pioneers' asünung state tejakleni aotsü angateta inyaktsü ayongzükba liasü.

Iba sülen Music Club ajanga temeja ken ka aten aser Akumtola Lemtor, Associate Pastor, Women, Union Church ajanga sarasadema sentong tembang.

Party lenirtem den onok lir: NPF Minority Wing

Dimapur, Rongjui/Sept. 08 (TYO): Naga Peoples' Front (NPF) tir Apong Pongener, MLA & Secretary General Achumbemo Kikon aser Leader of NPF Legislature Party (MLA) Kuzholuzo (Azo) Nienu nung kübok party lenirtem den onok shidak nokdaka lir, ta NPF Minority Wing sangdong ka ajanga ashi.

Region nung telungjem alitsü, akangjungshiteptsü aser Pan-Naga aser talisa Nagaland, Manipur aser Arunachal Pradesh nung aliba nûburtemi jangraba wazüka ayutsü merangba nung bendanga agütsür nokdakba asoshi lenirtem dang pelar, ta Minority Wing ajanga ashi.

September 6, 2025 nü Central Executive Council nung lemtetba ama Party tir, CEC aser Party Legislators temi tang aser tesüiba mapang NPF lenirtem tsüngta telungjem alitsü ayongzükba nung bhukuma nokdaktsü Minority Wing nung lenir aser tanidaker ajungai pangjemshi, ta NPF Minority Wing (Central) tir Bishnu Bhattacharjee-i ashi.

Party indang tematiba tentet ajanga telemtetba agiba ya Nagaland nung yimjung aser terenlok bener arua tejakleni aotsü asoshi nüngdakba maparen lir, ta pai ashi.

CEC pangzüng, talisa taoba



Bishnu Bhattacharjee, President, NPF Minority Wing Central.

mapang NPF züngsem ajanga dang party aser nûburtemi aginüba ama meyipa shilangtsü renemba asoshia Minority Wing-i pela agizüker.

Maneni NPF Manipur State Unit tir Awangbow Newmai aser Manipur nungi NPF MLAs ajungai temlung ajak agi NPF Central leadership bhukuma nokdakba aser CEC senden nung pangzüng renemba atema pela agizüker, ta Minority Wing ajanga ashi.

Party tashi itshitsü asoshi NPF indang constitution aser lenirtem kübok bendanga agütsür inyaktsü temlungtetba nung lir aser Nagaland nung aliba nûburtem asoshi yimjung, terenlok aser teti atema solution bener arutsü tashi aliba regional party-ji NPF ya dang lir ta sangdong ajangasa ashi.



TIR YIMYIM YIMOBILEM (EDITORIAL)

DIMAPUR TUESDAY, SEPTEMBER (RONGJUI) 09, 2025

Menur asüyonga arubaji junger !

Manipur nung Imphal lenden len Meitei nung o Kuki nung na tsünga lendong timtem tulu atalokba sülen joko küm ana dak tali süir, saka linük nung yimten tashi tulu aketsang, ato kilonser Narendra Modi-ibo tangushia kena mangushi Delhi nungi dang repranga tamajung tataloktsütem ajak atalokogo. Joko, Manipur-sa süaka Meitei nung lima Imphal lenden nungbo Kuki nungbo azüjang kata mali toktsür ogo aser tanaben arua alitsüba tarendaktsüka aser tetsübuttsüka kümogo, anungji tangsabo akhi ama Imphal nung Kuki nung meypa arua alitsübo otsü maka kümogo. Imphal lenden nung Kuki aser Meitei nung na külemi melitetsüsa lendong atalokbaji, shitakba nungbo Kuki aser Naga Naga nung na külemi longjemer Meitei nungertem nem Scheduled Tribe jenjang magütsütsüla ta center nem takangba agüja lokti senden ayongzük aser iba anogo nung, kechikomakaser, Kuki nung o Meitei nung na tsünga rara tenzük aser Imphal lenden nung Kuki nung kiojen raksaja apuso, anungji Kuki nungertem Imphal lenden nungi ajentsüsa aküm. Atangji, iba mapang Meitei nung kinunger, medemer aser kiyongertemi Kuki nung kümzükba otsü tajung saka temulung shirangtsüsa aika ataloka lir. Iba ama meimlaba lendong ka, kin o kin na tsünga atalok nungji, Naga nungertem ola maka aküm aser Meitei nungertema ST jenjang meshia aliba ola toa anen aser kasa state nung küm noklang aika külemi lia arur, ajungbenaka Meitei nung o Kuki nung na tsükchir akümtsüsa atalokba yagi shinga majangzük saka ajak akoksadagi. Atangji, nisung asünungji aser state ka nung kin aika meyoaktepa alir asünungji, tenük meremtepa alitsüa akok saka temai adoka jembiba o kaji, Manipur nung Kuki nung yim tasen aküm manener aser yamaji nütsüng renloker, iba jagi talisa Manipur nung Meitei nungertem tipmatem kümdaktsür. Atangji, asenok Naga nungertem rongnung Konyak, Khamniungan aser Tangkhul nung amato Kuki nungertema India nung dang masü saka Myanmar nunga lir aser Myanmar nung alir Kuki nungertem aruagi ozüng alema Manipur nung government-i wazüka ayuba arem lepboka yim küma aoer ta asüba osanga Manipur government ket nung liasü. Ibaji dang masü saka item jagi Myanmar len nungi ozüng memelaba mozümora tamajung bener arua shibelenba mapa inyaker ta aiben aija jembiba osanga angashia aruogo. Item osangtsüsangtemji shitak asütsüa akok aser, atangji, shisabulutsüka, anungji Manipur government-i nokdangtsüla. Ajisüaka, Myanmar len nungi arurtemji nokdangtsüsa inyaksü melen Imphal nung külemi alir kasa sensosangertemang melitetsüsa inyakbaji Meitei nungertema shisamaka ka inyakogo. Joko, inyakadokerji meinyak mesütet, ajisüaka lendong tulu adoka maodang, ato kilonseri süoka ia bilema nokdangtet nungbo, koda jungla ta sasasete bilemer. Ashiko, aiben asenoki kin kidong aser tamangba yimsü tsütsü len atsünga bilemer, ajisüaka yimten yimsüsübaren nungbo ozü kin, par kin aser Hindu, Muslim aser Christian ta kecha mali, ajak India senso tajung kaka ta bilema aser züngshis inyakra lendong ataloktsüba nungia kümzüktettsü aser nübortema tesünep nung putepa lidaktsütettsü. Ajisüaka, item Khristan-temjibo mesüra Muslim nungertemjibo mesüra Hindu nungertemjibo melidaktsütsüla, meindoktsüla aser parnok nemjibo kecha temetena magütsütsüla ta bilema nübortem tsükchitepdaktsütsü dang bilemra, India ama nungbo iba tebilemba jagi nübortem dang masü saka peia dena akoksatsü. Ashiko, iba jagi Manipur state government-a anentsüsa aküm sudi. Tangbo item ajakji ataloka arunungji, tesasaba o asü mesüra teimla o ka bener arutsüar memetet, saka tang menur süaka ato kilonser Narendra Modi Manipur tonga arubaji junger. Atangji, pa aruba agia Meitei aser Kuki nung nabo tangsabo külemi melitetsü, ajisüaka kin ana prongla temulung terabo anisüngzüktsüsa ato kilonseri shisa tasen kabo bener arua lemsateptsü imlaa atar.

OLEMSABANG

SEN ASER RONGSEN KISÜNG AGI NISUNG TAKÜM MALIR

~ L. Kika Pongener.

Alima nung mimchir taküm aliba ya sen aser rongsen kisüng agi taküm ya alir masü, saka Tsüngremi apuoktsüba taküm tangola agi taküm ya alir. Yisu alimai arur, tebu pa nem nungloktsüba mapa tenzüktsü atema tzü nung Baptir lia, temenen tanelai atitangtsü asoshi pa azüngmeyakdak lisem limai anir ao. Yisu anogo lir-nu aser lir aonung lumiseta lir külen, temenen tanelai Yisu dangi arur ashi, "Na Tsüngrem chir süra, item lung agi amtsük kümang ta shiang"....ta atitang. Saka Yisu-i langzü, "Nisungi am tesa agi dangbo taküm malitsü, saka Tsüngrem bang nungi adokba o shia agi alitsü" (Mathi-4:4). Iba putu nung tanü amai sen amshiba mapang ka masü, taküm alitsü atema amtsükji kanga tongtipang liasü sudi. Yongji, temenen tanela-i lung agi amtsük kümdakjang ta ashi sudi. Ashiko, tanü putu nung atidang asübo, 'Item lung yagi 'SEN' kümdakjang ta shila'.... ta shisadanger. Yisu-ia 'Nisung 'SEN' agi dangbo taküm malir' ta langzüla...ta bilemer. Atangji, Yisu-i inyakdi süra, lung agi amtsük kümdaktsütsüba pa tsüngdang aji kecha tasak masü, saka mojing sentong nung pai ashiba anga-a aji inyaksüba Yisu-i memulung. Atangji, Yisu-i ashiba ama alima nung nisung ya amtsük aser chiyungtsü kisüng agi taküm alir masü. Ajioda, temang shi (Physical body) nung timtem kecha mali tashi-ita anema aliba ya, Tsüngremi taküm agütsüyong, pa taochi ajanga taküm alirba dang. Ajisuaka, Tsüngremi asenok dak nungi taküm tangola ya agienadokra, iba second-minute nungji asenok takümüji tatempang asütsü. Anungji asenoki asen akaba rongsen dak temulong lema melili.

Alima ya tazüngla dang aliba Tsüngremi o ka dang ashiba agi, anung aser alima ajunga ya poktetdaksü...."Tetenzük nung o liasü, o Tsüngrem den liasü, aser o-ji Tsüngrem liasü. Tetenzük nung pa Tsüngrem den liasü; Kechisarena Pa ajanga adok" (Yoh-1:1-2) Alima nung taküm aliba ajunga ya Tsüngrem bang nungi adokba o ka agi taküm alirba dang, Tsüngremi asenok taküm tangola ya agienadokra, iba second-minute nungji asenok arakzüba ya anenadoktsü. Asenoki kanga tuluka amai bilemyongjia asenok takümüji naro ka tanep tobur junga punga aliba nikongdangbo azüla-a aoba ama, aser aküm (Shadow) ka amai jena oadoktsü. "Tetsüri asoba nisung arishi tatsü, naro ka ama apunger aser azüla-a oadoker; Ano aküm ka ama ajener aser meli-i akümer" (Yob-14:1). Asen arishi anogo ya sutaker suksen dang nungi tekaraba aor aser teimla mekai akümer. "Kü anogo sutaker suksen dang nungi tekaraba aor aser teimla makai akümer" (Yob-7:6). Temenen tanelai Yisu atitangba ama, anogo shia iba küsa ola jagi asenoka atitanger. Yisu anogo lir-nu tashi lumia arem nung jajar asünung; pa kanga yaseta liasü....Anungji Yisu atema amtsükji kanga tongtipang liasü. Yongji, Satani Yisu amtsük agi atidang. Ibaji mesuka tanü asenok danga yimden rongsen, arogo rongsen aser lokti rongsen ya ne meyong kümer na agiang...ta atidanga alitsü sudi.

Tanü putu nung sen dang lirbo aseni kechi aginur ajak angur, kechi inyaknur ajak inyakteter, aser alima nung akaba Hon, Taribi aser senti rongsen ajunga alizüktettsü. Asen kidang ayung-ayunga mener kechi oset aginur, kechi chiyungtsü chinur ajungaji 'Online' aser 'Home delivery' ajanga ki tonga bentsür arur. Atangji, sen dang lirbo sorkar-jia aseni azüoka anishitettsü. Tanü putu nung takartemi Election nung Candidate tokü-ter sen agüja yaria atokdaksür, parnokji Rulling sorkar nung Cabinet Minister atar; sorkar-ji pei kapu nung ammer atsüshia anishiba nisungtema lir. Ano sen dang agütsürbo kechi inyaknur ajak inyaktettsü, oda nisung taküma tepsetnura tepsettsü akoktsü....Kechiyong supokrem agi nisung tenuk pokdaksür aser nisung dang meimtsüba aser aochia bilemtsüba shisatsü samadaksür. Nisung aikati sen dang ngurbo meinyaktsüyim mapa ajak inyaksü temulung ulua akümer aser aaktsüba shisatsü meli-i akümer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

US aser Canada na nungi Yihuda nunger 220 Israel tonga aruogo



August 20, 2025 nü US aser Canada nungi Yihuda nunger 220 tayimtsü ka nung Tel Aviv nung aliba Ben Gurion Airport tonga arudang tangokba noksa nung angur.

Ben Gurion, September 08 (Agencies): Taoba ita US aser Canada na nungi Yihuda nunger 220 Israel-i meyipa aruogo.

"August ita tatembanglen tayimtsü ka ajanga Yihuda nunger aika Tel Aviv tonga aruogo. Onoki kibong aika tayimtsü ka ajanga anir aru. Iba ya puti otsü aser Laishiba nung shia aliba den sendaktepa lir," ta Nefesh B'Nefesh ("Soul to Soul") organization-i metetdaksü.

New York nungi tayimtsü ka nung passenger 225 mener Tel Aviv nung aliba Ben Gurion airport tonga aru. Iba ya Israel nunger tarutsü tia lir, ta parnokisa metetdaksü.

Israel tonga aruba sülen passenger rongnung ka Shawn Fink-i, "Iba ya tepelatsüka lir aser ni mamangteter. Iba ya nükjidong atangji nung atalokba lir," ta ashi.

Paisa, "Iba ya America aser Canadian Yihuda nungertem atema tepelatsü mapang ka lir, aser Tsüngremi nangzükba ama pei limai (Israel) tanaben shilangba lir," ta ashi.

Philadelphia nung tanur doctor, David Tauber'er kibonga Israel-i meyipa aruogo.

David-i, "Onoki mangdang atangji ataloktsür. Onok aruba sülen tanaben iba lima yangertsü atema bilema liasü. Puti otsü yanglutsü atema tang onok yangi (Israel) lir," ta ashi.

Alima tesem balala nungi Yihuda nunger tanaben Israel-i meyipa arua Israel nung adenshiba dang ya "Aliyah" ta ajar.

Yihuda nunger tesayur Rabbi Yehoshua Fass-i, "Alima tesem balala nungi Yihuda nungertem kidangi tanaben shiranga Israel senso akümba dang 'Aliyah' ta ajar," ta metetdaksü.

Ibri oshi nung aliyah tetezü "temaleni atuba" lir.

"Laishiba otsü nung parnoki benjung amongtsü atema Yirusalem-i atu, aser tanü item nüburtem meyipa aruba ya kanga tongtibang lir. Taküm nung nükjidong ka ataloktsütsü, taküm tasen ka tenzüksü aser rara mapang nung yariteptsü atema parnok yangi arua lir," ta Fass-isa metetdaksü.

St. Louis aser Los Angeles nungi meyipa aruba Yihuda tsür

anatibo Israel Defense Forces (IDF) nung adenba sülen linük atema raratsü tebilemba aliba lemsatepogo.

Yihuda tsür ana (ka arrshi küm 18 aser ka 20) jagi, parnoki Israel sepai nung adenba sülen Hamas samatsütsü atema inyakba nung shilem agitsü melunga lir, ta ashi.

Nefesh B'Nefesh ("Soul to Soul") organization-i Israel Ministry of Aliyah & Immigration den longjemer tang tashi nung charter tayimtsü 65 nung Yihuda nungertem Israel-i anir aruogo.

Nefesh B'Nefesh nungi Tony Gelbart-i, "Iba ya tayimtsü 65buba liasü aser item tayimtsü nung nisung 90,000 dak tali alima tesem balala nungi Israel-i anir aruogo," ta metetdaksü.

Tawa Israel-i meyipa aruba Yihuda nunger rongnung ka, Itai Baskin-i, "Onoki meyipa arunüa liasü aser ajioda inyaksü ta meteta dang liasü. Kübui kü dang, asenoki yangi America nung kechi inyaker. Shidakba agibo asenok tang mapang ya Israel nung alitsüla, tasa shia aruogo," ta metetdaksü.

August ita tatembanglen Israel-i arurtem rongnung arrshi küm ita 6 kinü ka densema tanur 125 liasü aser tambusangji arrshi küm 72 liasü. Yihuda nungertemji Ohio, Michigan, Pennsylvania, Ontario, Canada nungi arurtem lir.

Gelbart-i, "Item tayimtsü nung doctor tem, lawyer tem, engineer tem, chiropractors, kaketshirtem, kidang yaritepertem aser yimsü lenirtema densema liasü. Parnok ajak ya

Zionists lir. Yihuda linük nung terenlok alitsü aser iba linük kümzüksü atema Zionist ajaki bilemer," ta metetdaksü.

Laishiba nung Abraham nungi jakzükertem tanaben pei limai meyipa aotsü tenangzükba lir. Iba ya Tsüngremer tajaba inyakba lir, aser iba nungji temoatsü lir.

Yihuda nunger Fane-i, "Israel-i aruba tetezü ni memetet, saka ni kidangi shilangogo ta ni meteta lir. Iba ya kü sentong dang nungi tuluba lir ta ni meteta lir. Tsüngremi ni yaritsü aser ni len anitsü ta ni meteta lir," ta metetdaksü.

Tawa Israel-i meyipa aruba Yihuda nungertemji airport atongba sülen bus ka nung terminal-i anir aoba sülen benjungtepa liasü.

Israel nung Yihuda nunger kibongtem tanaben longjemdaksü atema 2015 küm Israel Ato kilonser, Benjamin Netanyahu-i nangzükba sülen Ethiopia nungia Yihuda nunger meyrjang aika Israel tonga aruogo.

Tejen Lai nung lai tekong aika nung tatembang anogo atongtsü anasa alima tesem balala nungi Israel chirtem Israel nung adenshitsü indang shia lir. Isaia 11:12 nung Tsüngremi Israel nungertem anidentsü indang shia lir, Yermia 29:14 nung Tsüngremi Yihuda nungertem linük balala nungi shilangtsü nangzüka lir, Ezekiel 20:41-42 aser Ezekiel 36:24 nung linük balala nung Israel nungertem pei lima nung adenshitsü indang shia lir aser Mica 2:12 nunga Tsüngremi Israel chirtem adenshidaksütsü indang shia lir.

ANOGO ABEN TSÜNGREM DEN

Merüktettsüba Jenjang Tulu (T. Ken 51:18, 19)

Temenen merüktettsübaji temela masü. Tsüngremi kechi inyaksü akang temulung nung yuang. Temeneni sentsü adokdaksür, menendaksür aser tashidak adokdaksür, koba Yisu Khrista azü ajanga dang atsütoktet aser tatok agütsütet. Asenok ajak teti tatem maka asütsü dalang, saka Pa asenok melen asü. Taochiji asenok dak alangba agi agütsüba masü; taochiji asenok dak malangba Tsüngremi asenok nem agütsüba lir.

Kodang asenoki temenen nangzüker, Tsüngrem tsüngdang Yisu asenok melen noktaker (1 Yn. 2). Pa asenok asoshi temepishitsür lir. Kodang temeneni na atitangdir, ne meneni Yisu kangki nung meta ta bilemtetang. Kodang nai temenen menar nai na anema aser kibong anema dang masü saka Kümtetdakba anema tai menar ta bilemtettang. Pa na atema asü. Pa na atema yiru, Kotak nung chuba menden tsüngdang ne tenüng nung noktaka lir. Merüktettsüba jenjang tuluji kar na atema asü? Ibai temenen memenatsü asoshi tajungshiba tulu lir.

Na kümzüka lira, na tatok ngua lir-temenen sentsü na atema aidokogo.

Tsüngremi ne menen züluoka mayur ta bilemtettang, saka Pai ne mapa züluoka ayur, aser temeneni meinyakdaksütsü nokdanger ta bilemtettang.

Tsüngremi merüktettsüba mapa teti asoshi inyakadok ama kodanga tebilem. Tatok agütsübaji jenjang tulu agi ali, Khrista azü. Tanaben na temeneni atitangra, Yisu Khrista takümi ne taküm alizük ta bilemtettang.

Archaeologist temi Egypt nung küm 1,500 tejaklen aliba Tenla ki ana angu



Cairo yimti kübok Kharga Oasis nung aliba Ain al-Kharab tesem nung archaeologist temi tutetba kiojen noksa nung angur. Iba noksa ya Egyptian Ministry of Tourism & Antiquities-i lemsatep.

September 08, 2025: Egypt nung archaeologist temi küm 1,500 tejaklen aliba Tenla ki ana ngutetogo; iba tesem nungji Yisu Khristai shiranger ka aneptsüba noksa-a ka densema nguogo, ta osang ka ajanga metetdaksü.

Tawa Egyptian Ministry of Tourism & Antiquities-i sangdong ka ajanga, tawa tutetba Tenla ki tejen anaji "Early Coptic Era" mapang nung aliba asütsüa akok; iba mapang nungji iba region nung alirtem aikati Khristan yimsü agizüka liasü, ta metetdaksü.

Tenla ki anaji Cairo yimti kübok Kharga Oasis nung aliba

Egypt nung Khristantem ola lir. Iba ya lisem lima nung azüngmeyakdak tesüiba küm aika wazüka liasü," ta kasa osang ajanga metetdaksü. Iba tesem nung aliba kiojentemji lungro agi yangluba lir.

Ano Tenla ki ka nungbo Yisu Khristai shiranger ka aneptsüba noksa ka densema lir. Egyptian Ministry of Tourism & Antiquities-i iba noksajibo melemsatep ajsüaka iba tesem noksaji lemsatepogo.

Egypt nung Coptic Khristantem ya Aso Ibuba mapang nungi liasü. Yisu nütsüng Mark-i mezüing iba tesem nungji Khrista osangtajung proka liasü.

Egypt nung Athanasius aser Origen na ama Laishir takuket aika adokogo. Talisa Laishir ana jagi Laishiba pusema liasü aser akhidang Khristantem tamang jenjang indang jungjunga meteta liasü.

Egypt nung Khristantem dang Coptic Khristan, ta ajar. "Coptic" tetezü "Egypt nunger" lir.

AO OSHI ANGAZÜKDAK:**TANÜ ANGAZÜKTSÜBA OJANG****Tetsübu**

(verb) tasü itang ta ashiba, metsübutsäla (do not fear)

* Kotak tenyartemi sannükertem dang tetsübu ta ashi.

Tetsükdaktsü

(n) tenokdangtsü, moutettsüsa ajuruba (obstruction, obstacle)

* Yimten ken o jembia aodang tetsükdaktsü aika ajurur.



Tir Yimyim

OLONG PAITEP # 7265

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- Nisung jenti - (5)
- Tsük rudenba - (5)
- Temzüng tesashi - (5)
- S ___ i - (3)
- Nisung telemsa - (3)
- Anogoshi - (4)
- Ajanga aor - (4)
- Tsük rizüngdak - (3)
- Tebang nungi adokba - (3)
- Süngdong tatembangtiba - (5)
- Meputep - (5)

LANGTSÜNGLEN

- Tenük telong - (9)
- Committee dang ajar - (5)
- Yagi ki okdoker - (7)
- Yim lenmang - (5)
- Temoatsü keter meyipa aruba - (9)
- Kanga junga menemba - (7)
- Majinü - (5)
- Tzüma nung senzüba - (5)

OLONG PAITEP # 7264 TELANGZÜBA**TIPIEN :**

- Bangsemo, 6. Tiptem, 8. Jen,
- Talila, 11. Aren, 12. Tzübo,
- Alia, 16. Angati, 17. Odi,
- Azü, 19. Sünglang.

LANGTSÜNGLEN :

- Yipten, 3. Nüja, 4. Sangro,
- Milen, 7. Tulu, 10. Laza,
- Aben, 12. Tiyong, 13. Ajizük,
- Aitsü, 15. Tasa, 16. Aina.

NAI-A YA METETTER MA

Game of Thrones nung "The Mountain" ta ajasang Hafthor Bjornsson-i alima otsü tasen ka yangluogo. Birmingham, England nung 2025 World Deadlift Championship alidang Icelandic nunger Hafthor-i 510-kilogram (1,124-pound) deadlift ajungketa liasü. 2018 nunga pai 505kg ajungketba atema World's Strongest Man tenüng jalokja liasü.

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

PM Modi-i Bhupen Hazarika nem tetushi agütsü**Bhupen Hazarika****Narendra Modi**

Guwahati, September 8, 2025 (Agencies): Bhupen Hazarika arishi küm 99 ajungba anogomung nung Prime Minister Narendra Modi-i tetushi agütsüogo.

Hazarika-i India sobaliba nung shilem tulu agiogo aser art ajanga pai telongjem adokdaktsü ta Modi-i ashi.

"Bharat Ratna awardee Hazarika-i music nung dang masü saka iba dak alia mapa inyakogo. Pai mejemba kentem ajanga taochi, temeten, aria bilemba aser maitsü indang osangtem prokshi" ta Modi-i ashi.

Bhupen Da-i alima tesem balala sema senzü aser nisung aika den ajurutep saka pai Assam den tesentaktep meraksa aser sobaliba benshi ta paisa ashi.

Hazarika-i Cotton College aser Banaras Hindu University nung azünga sülen United States nung Columbia University nung azüng aser idakji pai alima lennirtem aser musicians aika den ajurutepa shisa lemsatep, ta Modi-isa metetdaktsü.

Hazarika-i bendang lima alidang African-American civil rights activist Paul Robeson den ajurutepa liasü. Paul indang ken Ol' Man River ajanga Hazarika ajungmeso aser iba nungji ajemdaker Assamese composition Bistirna Parore mejema liasü.

Hazarika-i Indian folk music nung shilem tajung agiba atema Taoba U.S. First Lady Eleanor Roosevelt-ia pa nem gold medal ka agütsü.

"Alima nung nüngtugu

kümaka Hazarika India-i mulungtet. Pai radio, theatre, films, aser documentaries ajanga shilem tulu agiba atema tenüngsang agütsür" ta PM Modi-i ashi.

Hazarika-i inyakba mapatem ya Ek Bharat, Shreshtha Bharat den kanga puteper. Pai Assamese, Bengali, aser Hindi oshitem nung ken mejema aten ta Prime Minister-isa ashi.

1967 nung pa independent MLA ka ama takok angu saka pai politics nung temulung magütsü. Pa sempet ajanga loktiliba tenzüik aser iba jagi Padma Shri, Padma Bhushan, Padma Vibhushan, Dadasaheb Phalke Award aser Bharat Ratna angu.

2011 nung pa asüadang nisung lakh aikati pa den asüpila sentong nung aden. Pa asüdanga nisungtem anidena liasü. Pa Jalukbari hillock nung arem aser iba ya pai teti tetsüba Brahmaputra ayongküm nung lir ta Modi-isa ashi.

Assam sorkar aser Bhupen Hazarika Cultural Trust ajanga pa senmang wazüka ayutsü atema inyakba tenüngsang agütsür. Lanuputui Hazarika dang nungi angazüktsü ayongzüker, ta Modi-isa shisem.

Mendipathar College chairman nungi MLA agientsü akhanger

Shillong, September 8, 2025m (Agencies): Confederation of Meghalaya Social Organisations (CMSO), Post Graduate Students' Union (PGSU) NEHU Tura campus, aser social activist Cherian Momin nungeri Mendipathar MLA Marthon J. Sangma anema Meghalaya Governor Chandrashekhhar H. Vijayashankar dangi joint petition ka züluogo.

Mendipathar College Governing Body chairman menden nungi MLA Marthon J. Sangma agienang ta parnoki mepishir. MLA Marthon-i tejak repranger, recruitment rules alema inyaksangshir aser educational governance alenbanga ayur. Pai inyakim shitak meinyaka college nung part-time lecturer inyaktsü atema par jala Dingri D. Shira shim ta joint petition nung shia lir.

Dingri D. Shira shimba ya Governing Body approval, public advertisement, mesüra Directorate of Higher and Technical Education nungi temelaba magii dang inyak. August 22, 2023 nü shidi ka ajanga dang par jala mapa nung aniok. Iba shidi nung memo number mesüra official authorization kecha mali ta parnokisa ashi.

Iba dak sendakba nung RTI tasüngdangba ka nung Mendipathar College principal-i July 24, 2025 nü telangzüba agütsüba nung Governing Body-i la shimoktsü lemtet kecha magi ta shia lir.

MLA Sangma-i January 2024 nung Governing Body tentet aser idakji pa president asütsü pa sasa shi. Iba telok nung neutral academic representatives masü saka yimtenren tsütsü tejak repranga shim ta joint petition nungsa shia lir.

Parnokisa senotsü tim mesüi amshiba onük ka shia lir. "Mendipathar College indang maparen kar State Bank of

India-i anena lir aser ibaji authorised signatories atema lir. Iba ajanga college ketdangsübaren nung timtem aliba sayur" ta joint petition nungsa shia lir.

Meghalaya Governor-i iba atema bushisüngdang ka asütsüla aser iba mapa metembang tashi Governing Body chairman nungi Sangma agiena atatsüla. Governor-isa statutory rules aser University Grants Commission (UGC) regulations nung ajemdaker Governing Body shimshitsüla ta parnokisa akhanger.

"Iba ya politics atema masü saka higher education governance kümzüka ayutsü atema lir. Article 14 aser 16 den National Education Policy 2020 kübok guidelines nung ajemdaker mapa inyaktsüla" ta parnokisa metetdaktsüogo.

Marthon J. Sangma ya North Garo Hills kübok Mendipathar constituency nungi MLA lir aser pa nungi osang kecha mali.

Taoba Manipur DGP-i NH-2 lapoktsüba lemtet pusemer

Guwahati, September 8, 2025 (Agencies): Sorkari National Highway 2 lapoktsü lemtetba pusema nungiter aser iba lenmang ya kanga nüngdaker ta taoba Manipur Director General of Police Yumnam Joykumar Singh-i metetdaktsüogo.

Ketdangsürtemi NH-37 aser Indo-Myanmar arrtsü nung Moreh lenmang dena tongtipang lenmangtem nung temulung agütsütsüla ta pai ashi.

"Manipur ya ali agi meketbanga aliba state ka lir aser nisung teimba kati tayimtsü

ajanga senzütsü makoker" ta Yumnam Joykumar Singh-i ashi.

Tensa süngjemdaktsütsü atema ketdangsürtemi tongtipang highway ajak nung security agütsütsüla ta pai ashi.

N. Biren Singh-i aniba taoba sorkar dang nungi President's Rule kübok security tensa tajungba kümogo. Ajisüaka, telung nungbo kin o kin tem tsünga mepetmesütep lir ta Yumnam-isa metetdaktsü.

Meitei aser Kuki-Zo nunger putepshitsü atema neutral government ka alitsüla aser resettlement process maparen

inyaktsüla ta paisa ashi.

Meitei aser Thadou civil society groups tsünga tawa olemtep agiba ya kanga tajung saka temulung lemteptsüsa mapa meinyakra yimjung malitsü ta paisa shisem.

Myanmar nungi ozüng alema aruba ajanga tensa majunger. Manipur sorkari refugee settlements anepalu mesüteter kechiyong Mizoram nungbo long-term integration tenokdangba agütsür. Meitei nunger den rara nungi tangalen nungi arurtemi tongti shilem agir ta Yumnam-isa ashi.

WHO-i Taliban dang tetsür aid worker nem tenokdangba agüja aliba agintsü mepeshi

Islamabad, Rongjui/September 8 (Agencies):

World Health Organization-i Taliban ketdangsürtem dang Afghan tsür aid worker tem nem tenokdangba agütsür aliba agina parnok tebur guardian medeni menoknok agi kongshir aliba tesem nung tetsürtem nem teyari agütsütsü atema odaksütsü asüngdangogo.

Iba ita tetenzüklen Afghanistan anütoklen menoknok tesashi ka anokba sülen nisung 2,2000 asü aser aika yirua liasü.

"Item tesemtem nung tetsür staff tem agi anünga ajanga ken o tamajungba küma aodar," ta WHO indang Afghanistan office deputy representative Dr Mukta Sharma-i Reuters news agency dang ashi.

Lai ashiba agi, iba tesem nung medical staff shilem 90 bo teburtem lir aser tanungba shilem 10 ya tetsürtem lir, shirnok yirur alirtem anepalutsüsa doctor masü saka midwife aser nurse tem lir.

Iba ajanga teyari agütsüba nung tetsüdahtsü adokdar,

kechiyong tetsürtemi tebur staff tem den sadem sadema parnok tebilemtsü melemsatepteter aser teyari agütsü asoshi parnok kija moteter, ta laisa shisem.

September 1 nü magnitude 6 tesashi menoknok ka anokba aser iba sülen aftershock tem aruba sülen Afghanistan nung nisung 3,600 dak tema talidak makai aküm, shirnok 2021 küm bendanger sepaitemi linük toktsüba den Taliban-i sorkar atsünga sülen humanitarian teyari magütsüi akümba ajanga timtem tulu nung liasü.

Afghan health ministry aser Taliban administration nungi otongdar kati WHO-i temepeshiba agütsüba dak sendakba nung kecha telangzüba magütsü.

Taliban-i ashiba agi, parnoki Islamic özüng dak ajemdaker tetsürtem temeden akümtsübur, aser tetsürtem nem teyari agütsütsü atema parnoki takokba tashi jenjang tapet agitsü ta parnoki taoba mapang shiogo.

Taliban administration-i 2022 küm Afghan tsürtem shirnok

NGO balala nung inyaka liasü, parnok dang parnok ki adena or mapa minyaksü tetuyuba agütsü.

Humanitarian ketdangsürtemi ashiba agi, health aser education sector nung talenba terabo salatsüogo, saka nisung aikati ashiba agi, tetsür staff tem timba kümdaktsütsü asoshi iba ya teperi masü, talisa jongdak mapang senzügenpongsüsa akümdang talenba balala aliba ajanga tetsükdaktsü adoker.

Iba tetezü teyari agütsüba lokti tentettem aser tetsür staff tem inyakyim mejangjai akümer, ta Sharma-i ashiba den, ken o kar nungbo parnoki risk magiteter, ta shisem.

"Tenükdangba tulu agütsür lir aser mahram (tebur guardian nüngdakba) ken o maneni adoker aser ketdangsürtemi iba inyakyim agintsüba formally metetdakja mali," ta lai ashiba den, lar team-i iba ken o ya ketdangsürtem nem taoba hopta metetdaktsüogo.

(Maneni tapak 8 nung...)

Israel-i Hamas nem tatembangba tekum dangtsü agütsür

Jerusalem, Rongjui/Sept. 08 (Agencies): Israel nunger Defence Minister Israel Katz-i Gaza City nung operation tuluka agitsü ama ashi aser Hamas dang pua alirtem chioktsü aser bendanga agütsütsü mesüra samatsütsü ta ashi.

Social media sapang X nung, "Yipru tesashi kati Gaza City nung kongshitsü, kong Israel mitkari tang operation tuluka tagidak lir. Tanü, yipru tashi tulu kati Gaza City anüng aser kiralongrar indang kilem nung kongshitsü," ta ashi.

"Ibai Gaza nung aliba aser bendang lima hotels tulu nung aliba nisung tepseter aser tashiyim agi shi nung medemba Hamas asoshi tatembang tekum dangtsü lir: Pua alirtem chiokang aser ner nok-nü yujang - mesüra Gaza samatsütsü aser nenoka samatsütsü," ta pai ashi.

US Tir Donald Trump-i Hamas dang pua alir ajunga chioka Gaza rara tembangtsü asoshi pai renema aliba nung züngzükteptsü ashiba sülen Israel nungi iba tekum dangtsü

o ya ashi. Hamas-i anir telungpur temi October 7, 2023 nü Israel maka nisung 1,200 tepsetba sülen iba rara ya tenzük. Israel mitkari telangzüba agüja Gaza amakba nung Palestine nunger nisung 63,000 dak tema tepsetogo aser iba tesem nung ayawara tetenzüker lir.

"Nisung ajaki iba rara tembangdaktsüner! Israel nungeri kü indang Terms agizükogo. Tang Hamas-ia agizüktsü mapang lir. Aji magizükra timtem alitsü indang ni Hamas dang tekum dangtsü shiogo. Kü tsütsü nungi ibai 'warning' tatembangba lir aser iba sülenbo malitsü!" ta Trump-i pa indang Truth Social nung ashi.

Tir Trump-i iba sangdong agütsür mapang tatsüka lir Hamas-i kanga kumdanga telangzüba agüja, parnoki tangsa jembishinü akatsü renema lir saka pua alir ajak chiokba melen rara tembangba sangdongtsüla, Gaza Strip nungi sepai ajunga anizüker aotsüla

aser Gaza Strip nung yimsü asütsü asoshi Palestine nunger temeja committee ka tentettsüla, ta ashi.

"Ozü nübur anema tashiyim amshiba anentsü merangba mera kechi agidir Hamas-i pelashishia agizüktsü, aser ceasefire ka alitsü nükjidong nung America nungeri shisatsü agütsüba nguogo aser onoki akhangba ama item shisatsü ya tezüngzüktep ka kumdaktsütsü asoshi tetsüngtai aita ken o jembir ten tanen makai jembishinü akar," ta Hamas-i ashi.

October 7, 2023 nü Israel amakba mapang Hamas telungpuri nisung 251 pua bener ao aser tang parnok 48 Gaza nung alitsü ta amanger. Israel mitkari parnok 25 süogo ta ashir aser parnok tasü mang meyipa meshir.

Deobarnü Israel army temi Gaza City nung nisung aliba ki tuluka nung bomb pokloktsüba sülen iba tekum dangtsü ya agütsür. Deobarnü Israel nungeri amakba nung nisung 48 tepset ta ashir.

Nepal social media nokdangba anema longkak aiter 13 süogo

Kathmandu, Rongjui/Sept. 08 (Agencies): Nepal nung sorkari social media nokdangba mechi longkak aita longkak aiter aser security forces tsünga rara adokba sülen nisung 13 tepset aser aika yiru.

Facebook, X aser YouTube densema social media sapang tem shibangtsü telemtetba agiba mechi longkak aiter meyerijang aika Kathmandu nung parliament building kima adenshia liasü. Longkak aiter temi parnok ya Generation Z ta

ashir.

Police temi water cannons, süng aser rubber bullets amshitsüsa akum, ta Nepal indang Minister for Communication Prithiv Subba-i osangbener dang ashi.

Tiazü osang, dangar anema o tamajung jembiba aser online nung ashikülakba azüoktsü mechi social media sapang tem özüng agi alentsü nüngdaker ta sorkari ashir.

Ajisüaka Instagram ama sapang amshir Nepal nung

nisung million aika lir, shirnoki entertainment, news aser business atema item nung metaloka alir.

Longkak aiter temi placards amer "ojang ji ojang" aser "ochimashi mapang tembangang" ta yimyim ayimtena liasü.

Sorkar dak 'authoritarian' yimya aliba anema longkak aiter ta kari ashi.

Longkak aiter temi ya parliament anasa tenokdangba agüja aliba tesem ka anasai ao

Office of the
LONGMISA SENSO MUNG DANG
P.O Mokokchung - 798601 B.P.O Longmisa
Mokokchung : Nagaland

TENÜNGSANG AGÜTSÜR

**IMTISUPONG PONGENER**

**ALEMTETLA PONGENER**

Longmisa Senso Mungdang ajanga tenüngsanga Nagaland Puplic Service Commission (NPSC) Exam 2024 nung takok tajung angur nem konang tetushi agutsur.
1. **Imtisupong Pongener** S/o. Wb. Er. K. Wati & Wt. Cynthia Wati Inspector of Co-operative Societies (Class-III) under Cooperation Department.
2. **Alemtetla Pongener** D/o. Wb. Er. K. Wati & Wt. Cynthia Wati Commercial State Tax Officer (Class - II Gazetted) under Taxes Department.
Asen Teyanglur Tsüngremi tarutsü anogotem nunga temoatsü nung len ania moajangma.

Sd/-
Pangersosang
President, LSM

Sd/-
I Senkanungba Ao
G. Secretary, LSM



Office of the
Longsa Kaketshir Telongjem
H.Q. Longsa village
Dist. Mokokchung-798601, Nagaland

KHONANG TETUSHI AGÜTSÜR
Longsa Kaketshir Telongjem ajanga Sb. Moanungsang Jamir, Wb. T.Chuba Jamir aser Wt. Imlinungla, tena jabaso ajanga NPSC-NCS, NPS & Allied Service Exam 2024 tatidang nung Block Development Officer (Class-1 Gazetted) under Rural Development Department nung takok tajung nguteta asen Longsa Kaketshir nem khonang tetushi bener arutsüba asoshi tenüngsang agütsür.
Tsüngremi ne taküm aser ne wadang ajak nung maneni moajangma.

Sd/-
Sb. Temjenmeren
Tir, LKT

Sd/-
Kr. Bendangsenla
Tongti Zülur, LKT

Sosangmanen zünga Merangkong
Tuli Unit-i tenüngsang agütsür
Tsürapur Late. Masakaba aser Mrs. Imtilangla na jala **Wt. Dr. Mereninla Panthy Jamir** PGT. GHSS Tuli, lai 2025 Mokokchung District Teachers Award ngutetba asoshi Sosangmanen Zünga Merangkong, Tuli Unit ajanga pelar aser la nem konang nüngsang agütsür.
Tsüngremi maneni la wadang nung len ania moajangma.

Sd/-
Lemzüngkaba
Zünger President

Sd/-
T. Manen
Zünger Secretary



भारतीय प्रौद्योगिकी संस्थान खड़गपुर
INDIAN INSTITUTE OF TECHNOLOGY KHARAGPUR

Advt. No.: R/07/2025 dated August 27, 2025
Institute ajanga India nunger dang tsünglanglen agüja aliba asoshi **Online Applications** meshir:
1. **Chief Engineer** - 1 post
(Level-14 of Pay Matrix Rs. 144200-218200)
Online application agütsütsü anogo tatembang : 26-09-2025
Educational qualification, experience aser updates dak sendakba osang tejanga metettsü asoshi yangi angutsü:
<http://www.iitkgp.ac.in/non-teaching-positions>
CBC 21255/12/0011/2526 **कुलसचिव/ Registrar**

aser kabo jara sodanga ao. register asütsü anogo "Longkak aiter temi nokdanga aliba tesemi aitba sülen tear gas aser water cannons amshi," ta police odongtar Shekhar Khanal-i ashi.

Longkak aiter temi telungi parliament densema noksanga aliba tesem temi aittsü merangba sülen curfew ka benok, ta Kathmandu district office odongtari ashi.

Nepal indang Ministry of Communication and Information Technology nung

aser kabo jara sodanga ao. register asütsü anogo sükzüksüba sülen manidakba yong ketdangsür temi taoba hopta social media sapang 26 shibangtsü totuyuba agüja liasü.

Hokulbarnü nungi nüburtemi item sapang mamshiteti akum, saka kari VPNs amshia liasü. Tenokdangba agütsüba sülen ministry nung register süa sapang ana tanaben amshiteter.

Nepal sorkari social media nokdang masü saka item ya Nepal nunger özüng küboki aitdaktsütsü meranger ta ashir.

Satwik-Chirag nati anir Hong Kong Open asayatsü



Rongjui/September 8, 2025 (Agencies):

World Championships nung bronze medal anguba sülen Satwiksairaj Rankireddy aser Chirag Shetty nati anir India nung asayatem Mongolbarnü nungi tenzüka Hong Kong Open Super 500 badminton asayamung asayatsü.

Satwik aser Chirag na ya tang world No. 3 tarep lir aser India nung rongnungi tenati taküm tajungba asaya arudar.

Eighth-seeded India nung tarep shirnoki taoba ita World Championships nung tanabuba bronze medal nguogo, tena Hong Kong Open nung mezügbuba asaya Chinese

Taipei nung Tokyo Olympic gold medallist Chiu Hsiang Chieh aser Wang Chi-Lin na den asayatsü.

Tetsür kija asaya nung Olympics nung medal ana ngur alila PV Sindhu mezügbuba round nung Denmark tsür Line Christophersen den asayatsü. Sindhu taküm junga masayateti arudar saka taoba ita Paris nung World Championships nungbo terabo junga asaya-a quarterfinal tonga asayaogo.

India nung rongnungisa US Open title bener alisang Ayush Shetty mezügbuba round nung China nung asayar Lu Guang Zu den asayatsü.

Tebur kija asaya nung

Lakshya Sen mezügbuba asaya Chinese Taipei nung asayar Wang Tzu Wei den asayatsü. Paris Olympics nung pezügbuba nung tembangba sülen pa junga masayateti arudar.


Asayar tejen HS Prannoy, shibai World Championships nung kanga meranga asayar Denmark nung Anders Antonsen mekoki liasü, pa mezügbuba round nung Japan nung fifth seed Kodai Naraoka den asayatsü.

Tetsür kija asaya nung Anupama Upadhyaya fourth seed Japan tsür Tomoka Miyazaki den asayatsü, aser Rakshitha Ramraj, Thailand tsür taoba mapang world champion aser fifth seed Ratchanok Intanon den asayatsü.

Tebur traep asaya nung Hariharan Amsakarunan aser Ruban Kumar Rethinasabapathi na aser tetsür tarep asaya nung Rutaparna aser Swetaparna nata asayatsü.

Tarep temeyoktep asaya nung Dhruv Kapila aser Tanisha Crasto na Chinese Taipei nung Chen Cheng Kuan aser Hsu Yin-Hui na den asayatsü aser Rohan Kapoor o Gadde Ruthvika Shivani na China nung tarep Feng Yan Zhe aser Huang Dong Ping na den asayatsü.

Carlos Alcaraz-i US Open tebur kija asaya kokogo



Rongjui/September 8, 2025

(Agencies): Hombarnü US Open tebur kija asaya final nung Carlos Alcaraz-i set pezü asayaba sülen Jannik Sinner koka iba asayamung title benogo.

Arthur Ashe Stadium nung final asaya nung Spain nung asayar yagi 6-2, 3-6, 6-1, 6-4 agi Sinner madak takok ngua liasü.

Iba asaya akokba densema Alcaraz-i tang agi Grand Slam trokbuba kokogo aser pa World Rankings nung temaba jenjangi tuogo.

Lanur asayar ana yagi taküm Grand Slam pezü ya anana lemdanger kokogo. Alcaraz-i taküm küm tetenzüklen Roland Garros final nung Sinner koka French Open aben aser tang Flushing Meadows nunga kasa asayar koka US Open title benogo. Kasa mapang nung Italy nung asayar yagi taküm Australian

Open aser Wimbledon kokogo.

Alcaraz-i final asaya ya kanga tashi ita tenzüker aser mezügbuba game nung Sinner indang serve break asü aser 6-2 agi asaya ayong ayonga koka liasü. Ajisüaka tanabuba round nungbo Sinner-i tajungba asayateta pai 6-3 agi asaya akok.

Ajisüaka tasembuba set yabo Alcaraz-i tetenzük nungi amokbanger asaya aser asaya 6-1 agi koka liasü. Iba asaya ya Alcaraz-i 6-0 agi koker lila saka Sinner-i pa mak asütsü nungi kümzüka game trokbuba nung pa indang service game break mesüdaktsü koka liasü.

Set pezügbuba nunga arishi küm 22 tain Alcaraz yagi Sinner indang serve ka break asü aser asaya 6-4 agi koka iba asayamung title benogo. US Open densema tena taküm grand slam tasembuba final asaya liasü.

ICC Player of the Month atema Siraj nominate süogo

Rongjui/September 8, 2025

(Agencies): India nung fast bowler Mohammed Siraj, August ita atema ICC Player of the Month award asoshi nominate süogo. Oval nung England den tatemangbuba Test nung team takok dangi anitsüsa kanga junga asayaba sülen pa iba naroküm atema shimogo.

Pa den August ita atema New Zealand pacer Matt Henry aser West Indies nung fast bowler Jayden Seales nata nominate süogo. Tenapronglai pei team nungi tangar dang nungi alakteta tajungba asayaogo.

England den Test asayamung nung Siraj-i kanga tongtibang shilem agia kanga meranga asayaogo. Anderson-Tendulkar Trophy nung pa Test asaya ponguprongla nung asaya liasü. Iba asayamung nung pai over 185 dak tema aon aser wicket 23 agia, pa asayar ajak rongnung wicket timtiba agiba asayar liasü.

Iba asayamung nung pai tajungtiba asayabaji tatemangbuba Test nung liasü, kong pai wicket teku agi aser India-i iba asaya koka asaya 2-2 tang kasasa nung tembangba nung tongtibang



shilem agia liasü.

Jasprit Bumrah masayaba asaya nung Siraj-i kanga tashi ita anir asaya aser pai tongtibang shilem agia team takok dangi ani.

Kasa mapang nung Matt Henry- a Zimbabwe den Test asaya ana nung kanga junga asayaba sülen pa-a nominate süogo. New Zealand nung asayar yagi asaya ana nung wicket 16 agia liasü. Pai innings ana atong khi run 39 agütsür wicket 6 aser khi run 40 agütsür wicket 5 agia par team-i iba asayamung 2-0 agi akokba nung teyari agüja liasü.

Maneni West Indies team-i

küm 34 sülen ODI asayamung ka nung Pakistan mezügbuba akokba mapang Jayden Seales-i kanga tongtibang shilem agia liasü. Mezügbuba asaya nung junga masayatetba sülen pai tanabuba asaya nung wicket asem agi aser tasembuba asaya nungbo run 18 agütsür wicket 6 agi, koba pa indang career nung tajungtiba asaya liasü. Iba asaya nung Pakistan team nem run 92 dang yangludaktsür asayar ajak out sütsü aser parnoki alizüng tasen ka tongteta iba asayamung koka liasü.

August ita atema ICC's Player of the Month akoker ya iba ita tatemlen sangdongtsü.

BENDANGLI OSANG : Tapak 7 nungi...

WHO-i Taliban dang tetsür aid...

"Ibayongji onoki tang yabo ketdangsurtem dang tetsür mapa inyakerkem timba nüngdaker, tetsürtem anisemti aser tetsür staff tem kong ali idak nungjiagi bushia anir arudi ta ashitsü nüngdaker ta angateta liasü," ta lai ashi.

Maneni Sharma-i, tarutsü nung tetsürtem lendong balala ajanga aoksaba koktetsü aser kibong nung teburtem süatokba ajanga parnok tebur guardian ka medeni inyaksangshiyonga aotsü asoshi mental health care koda agitetsü, iba indang süoki ia bilemer, ta ashi.

Kunar province kübok Somai district nungi Peer Gul-i ashiba agi, par yimsüng nungi tetsürtem aika menoknok anokba sülen aoksateper lir aser iba ajanga parnok blood pressure kanga aika kümogo aser medical teyari magiteti lir.

"Parnok temang anepalutsü atema tetsür doctor ka danga mali aser tebur doctor ka dang lir," ta pai ashi.

Sharma-isa, Taliban-i tetsürtem high school aser university nung azüngtsü atema tenokdangba agütsüba sülen Afghan tsür doctor tem agi tanüngba küma odar. Tetsür doctor tem anitetsü atema Taliban-i tenokdangba agütsüogo.

U.N.-i ashiba agi, menoknok ajanga mashisa aliba tetsür 11,600 shi dak kongshiogo. Asia nung Afghanistan ya mashisa aliba tetsürtem asüba timtiba atalokba linük ka lir.

U.S. administration densema linük aser lokti tentet balalai Afghanistan nem teyari agüja aliba tajemba kümdaktsüba mesüra anenatokba ajanga linük nung health system kanga mejungi kümer lir.

U.S.-i teyari agüja aliba anenatokba ajanga taküm health facilities 80 shi shibangatokogo aser menonoki raksatsüba sülen health post 16 shibangogo, ta Sharma-i ashi.

BILEMDANGANG

"Azümesen agi nükjidong aika temseptsür."